

古文品外錄



古文品外錄

下冊

明・陳繼儒輯



第一輯

四十七種

據原刊本排印

貝葉山房張氏藏版

中國文學珍本叢書
第一輯第四十七種

中華民國廿五年九月初版


古文品外錄 (三冊)

普及本實價五角
特印本實價七角

校輯者
主編者
發行人
總經售

陳繼儒
施鰲山
貝葉廬
張靜廬
上海雜誌公司

上海總店：四馬路三二四號
廣州支店：永漢北路三三號
南京支店：太平路二四八號
雲南支店：土主廟街四七號
成都支店：華興街
漢口支店：湖北路中



初版本 1—2000本

古文品外錄

卷之七

六馬圖贊

唐太宗

其一曰拳毛騶。黃馬黑喙。平劉黑闥時所乘。前中六箭。背三箭。贊曰。月精按轡。天駟橫行。弧矢載戢。氛埃廓清。其二曰什伐赤。純赤色。平世充建德時乘。前中四箭。背一中箭。贊曰。灋潤未靜。斧鉞伸威。朱汗騁足。青旌凱歸。其三曰白蹄烏。純黑色。四蹄俱白。平薛仁杲時所乘。贊曰。倚天長劍。追風駿足。聳轡平隴。回鞍定蜀。其四曰特勒驪。黃白色。喙微黑色。平宋金剛時所乘。贊曰。應策騰空。承聲半漢。入險摧敵。乘危濟難。其五曰颯路紫。紫黑驪。平東都時所乘。前中一箭。贊曰。紫鸞超躍。骨騰神駿。氣響三川。威凌八陣。其六曰青驪。蒼白雜色。平寶建德時所乘。前中五箭。贊曰。足輕雪影。神發天機。策茲飛練。定我戎衣。

鵲鴿頌

唐玄宗

朕之兄弟。惟有五人。比爲方伯。歲一朝見。雖載崇藩屏。而有曖談笑。是以轡牧人而各守京職。每聽政之後。延入宮掖。申友于之志。詠棠棣之詩。邕邕如怡。怡如展天倫之愛也。秋九月

辛酉有鵲鵠千數，棲集于麟德之庭樹，竟旬焉飛鳴行搖，得在原之趣。昆季相樂，縱目而觀者久之，逼之不懼，翔集自若。朕以爲常鳥無所志懷，左清道率府長史魏光乘才推白鳳，辯壯碧雞，以其宏達博識，召至軒檻，預觀其事，以獻其頌。夫頌者所以揄揚德業，褒讚成功，顧循虛作，誠有負矣。美其彬蔚，俯同頌云：伊我軒宮，奇樹青葱，藹周廬兮，冒霜停雪，以茂以悅，恣卷舒兮。瓊枝同榮，吐綠含英，曜春初兮。蓐收御節，寒露微結，氣清虛兮，桂宮闌殿，唯所息宴，棲雍渠兮。行搖飛鳴，急難有情，情有餘兮。顧惟德涼，夙夜兢惶，慙化疎兮。上之所教，下之所效，實在予兮。天倫之性，魯衛分政，親賢居兮。爰遊爰處，爰笑爰語，巡庭除兮。觀此翔翮，以悅我心，良史書兮。

獻西嶽書

李靖

布衣李靖，不揆狂簡，獻書西嶽大王閣下。靖聞上清下濁，爰分天地之儀，晝明夜昏，乃著人神之道，又聞聰明正直，依人而行，至誠感神，信不虛矣。伏惟大王鑒猷擅德，肅爽凝威，爲靈術制百神，配位名雄四嶽，是以歷像清廟，作鎮金方，遐規歷代，哲王莫不順時禮祀，興雲致雨，天寶肯從，轉孽爲祥，何有不賴。嗚呼靖者，一丈夫爾，何得進不偶用，退不獲安，呼吸若窮池之魚，進退似失林之鳥，憂傷之心，不能自己，社稷凌遲，宇宙傾覆，奸雄競逐，郡縣土崩，遂欲建義橫行，雲飛電掃，斬鯨鱓而清海岳，卷氛祲以闢山河，使萬姓昭蘇，庶物昌運，卽應天順時之作。

也。又大寶不可以望據。欲杖劍竭節。未有飛龍在天。捧忠義之心。負濟世之志。吐肝膽於階下。惟神鑒之。願告進退之機。遂得平生之志。有賽德之時。終陳擊鼓。若三問不對。亦何神之有靈。然後卽靖斬大王頭。焚其廟。建縱橫之畧。亦未晚也。惟神裁之。

大周新譯大方廣佛華嚴經序

武則天

蓋聞造化權輿之首。天道未分。龜龍繁象之初。人文始著。雖萬八千歲。同臨有載之區。七十二君。詎識無邊之義。由是人迷四忍。輪迴於六趣之中。家纏五蓋。沒溺於三塗之下。及夫鷲嶺西峙。象駕東驅。慧日法王。超四大而高視。中天調御。越十地以居尊。包括鐵圍。延促沙劫。其爲體也。則不生不滅。其爲相也。則無去無來。念處正勤。三十七品爲其行。慈悲喜捨。四無量法運其心。方便之力難思。圓對之機多緒。混太空而爲量。豈算數之能窮。入纖芥之微區。匪名言之可述。無得而稱者。其唯大覺歟。朕曩規植因。叨承佛記。金山降旨。大雲之謁先彰。玉宸披祥。寶雨之文後及。加以積善餘慶。俯集微躬。遂得地平天成。河清海晏。殊禎絕瑞。既日至而月書。貝葉靈文。亦時臻而歲洽。踰海越漢。獻琛之禮備焉。架險航深。重譯之詞罄矣。大方廣佛華嚴經者。斯乃諸佛之密藏。如來之性海。視之者莫識其指歸。挹之者罕測其涯際。有學無學。志絕窺覷。二乘三乘。寧希聽受。最勝種智。莊嚴之跡既隆。普賢文殊。願行之因斯滿。一句之內。包法

界之無邊。一毫之中。置刹土而非隘。摩竭陁國。肇興妙會之緣。普光法堂。爰敷寂滅之理。緬惟
奧義。譯在晉朝。時踰六代。年將四百。然一部之典。緣獲二萬餘言。唯啓半珠。未窺全寶。朕聞其
梵本先在于闐國中。遣使奉迎。近方至此。既觀百千之妙頌。乃披十萬之正文。粵以證聖元年。
歲次乙未月。旅姑洗朔惟戊申。以其十四日辛酉。於大徧空寺。親受筆削。敬譯斯經。遂得甘露
流津。預夢庚申之夕。膏雨洒潤。後覃壬戌之辰。式開寶相之門。還符一味之澤。以聖歷二年歲
次己亥十月壬午朔八日己丑。繕寫畢功。添性海之波瀾。廓法界之疆域。大乘頓教。普被於無
窮。方廣真詮。遐該於有識。豈謂後五百歲。忽奉金口之言。婆娑界中。俄啓珠函之祕。所冀闡揚
沙界。宣暢塵區。並兩曜而長懸。彌十方而永布。一窺寶偈。慶溢心靈。三復幽宗。熹盈身意。雖出
無說無示。理爲不二之門。然因言顯言。力闡大千之義。輒申鄙作。爰題序云。

蘇氏織錦迴文記

武則天

前秦苻堅時。秦州刺史扶風竇滔妻蘇氏。陳留令武功道寶第三女也。名蕙。字若蘭。識知
精明。儀容秀麗。謙默自守。不求顯揚。行年十六。歸於寶氏。滔甚敬之。然蘇性近於急。頗傷妬嫉。
滔字連波。右將軍眞之孫。朗之第二子也。風神秀偉。該通經史。允文允武。時論高之。符堅委以
心膂之任。備歷顯職。皆有政聞。遷秦州刺史。以忤旨。謫戍燉煌。會堅寇晉襄陽。慮有危逼。藉滔

才略。乃拜安南將軍留鎮襄陽。初。滔有寵姬趙陽臺。歌舞之妙。無出其右。滔置之別所。蘇氏知之。求而獲焉。苦加捶辱。滔深以爲憾。陽臺又專伺蘇氏之短。讒毀交至。滔益忿焉。蘇氏時年二十一。及滔將鎮襄陽。邀其同往。蘇氏忿之。不與偕行。滔遂攜陽臺之任。斷其音問。蘇氏悔恨自傷。因織綿迴文五采相宣。瑩心耀目。其錦縱廣八寸。題詩三千餘首。計八百餘言。縱橫反覆。皆成文章。其文點畫無缺。才情之妙。超古邁今。名曰璇璣圖。然讀者不能盡通。蘇氏笑而謂人曰。徘徊宛轉。自成文章。非我佳人莫之能解。遂發蒼頭賚至襄陽焉。滔省覽錦字。感其妙絕。因送陽臺之關中。而具車徒如禮。邀迎蘇氏。歸於漢南。恩好愈重。蘇氏著文詞五千餘言。屬隋季喪亂。文字散落。追求不獲。而錦字迴文。盛見傳寫。是近代閨怨之宗旨。屬文之士。咸龜鑑焉。朕聽政之暇。留心墳典。散帙之次。偶見斯圖。因述若蘭之才。復美連波之悔過。遂製此記。聊示將來也。如意元年五月一日大周天冊金輪皇帝御製。

牛應貞傳

宋若昭

牛肅長女曰應貞。適弘農楊唐源。少而聰穎。經耳必誦。年十三。凡誦佛經二百餘卷。儒書子史又數百餘卷。親族驚異之。初。應貞未讀左傳。方擬□□□□。眠中忽誦春秋。起惠公元妃孟子卒。終智伯貪而復故。韓魏反而喪之。凡三十卷。一字無遺。天曉而畢。當誦時不教之者。

或相酬和。其父驚駭。數呼之。都不答。語已而覺。問何故。亦不知。賦令開卷。則已精熟矣。著文章百餘首。後遂學窮三教。博涉多能。每夜中眠熟。與文人談論。文人皆古之知名者。往來答難。或稱王弼鄭玄王衍陸機。辯論鋒起。或論文章談名理。往往數夜不已。年二十四而卒。今採其文。魍魎問影賦。著於篇。其序曰。庚辰歲子嬰沈痛之疾。不起者十旬。毀頓精神。羸悴形體。藥物救療。有加無瘳。感莊子有魍魎責影之義。故假之爲賦。庶解疾焉。魍魎問於予影曰。君英達之人。聰明之子。學包六藝。文兼百氏。頗道家之祕言。探釋部之幽旨。既虔恭於中饋。又希慕於前史。不矯枉以干名。不毀物而成已。伊淑德之如此。卽精神之足恃。何故羸厥姿貌。沮其精神。煩冤枕席。憔悴衣巾。子惟形兮是寄。形與子兮相親。何不誨之以崇德。而教之以自脩。異萊妻之樂道。殊鴻婦之安貧。豈痼疾而無生賴。將微賤而欲忘身。今節變歲移。臘終春首。照晴光於郊甸。動暄氣於梅柳。水解凍而繞軒。風扇和而入牖。固可蠲憂釋疾。怡神養壽。何默爾無營。自貽伊咎。僕於是勃然而應曰。子居於無人之域。遊乎魍魎之鄉。形旣圖於夏鼎。名又著於蒙莊。何所見之不博。何所談之不长。夫影依日而生。像因人而見。豈言談之足曉。何節物之能辨。隨晦明以興滅。逐形骸以遷變。以愚夫畏影。而蒙鄙之性以彰。智者視陰而遲暮之心可見。伊美惡兮由已。影何辜而遇譴。且予聞至道之精。窮兮冥。至道之極。昏兮默。達人委性命之修短。君子任

時運之通塞。悔吝不能繼。榮耀不能惑。喪之不以爲喪。得之不以爲得。君子何乃怒予之不賞芳春。責予之不貴華飾。且吾之秉操。奚子智之能測。言未卒。齟齬惕然而驚歎而起曰。僕生於絕域之外。長於荒遐之境。未曉智者之處身。是以造君而問影。既談玄之至妙。請終身以藏屏。初應貞夢製書而食之。每夢食數十卷。則文體一變。如是非一。遂工爲賦頌文。名曰遺芳。

自撰墓志

王勣

王勣者。有父母無朋友。自爲之字曰無功焉。或問之箕踞不對。蓋以有道於已無功於時也。不讀書。自達理。不知榮辱。不計利害。起家以祿位。歷數職而一進階。才高位下。免責而已矣。天子不知。公卿不識。四五十而無聞焉。於是退歸以酒德遊於鄉里。往往賣卜。時時著書。行若無所之。坐若無所據。鄉人未有達其意也。嘗耕東臯。世號東臯子。身死之日。自爲銘焉。曰有唐逸人太原王勣。若頑若愚。似矯似激。院止三逕。堂唯四壁。不知節制。焉有親戚。以生爲附贅。懸疣。以死爲決疣潰癰。無思無慮。何去何從。壠頭刻石。馬鬣裁封。哀哀孝子。空對身松。

醉鄉記

王勣

醉之鄉。去中國不知其幾千里也。其土曠然無涯。無丘陵阪險。其氣和平。一揆無晦明寒暑。其俗大同。無邑居聚落。其人甚精。無愛憎喜怒。吸風飲露。不食五穀。其寢于其行。徐徐與

鳥獸魚鱉雜處。不知有舟車械器之用。昔者黃帝氏嘗獲遊其都。歸而杳然喪其天下。以爲結繩之政已薄矣。降及堯舜。作爲千鍾百盞之獻。因姑射神人以遐道。蓋至其邊鄙。終身太平。禹湯立法。禮繁樂雜。數十代與醉鄉隔。其臣義和棄甲子而逃。冀臻其鄉。失路而天。天下遂不寧。至乎末孫桀紂。怒而昇糟丘。階級千仞。南向而望。卒不見醉鄉。武王得志于世。乃命公旦。立酒人氏之職。典司五齊。拓土七千里。僅與醉鄉達焉。故四十年刑措不用。下逮幽厲。迄乎秦漢。中國喪亂。遂與醉鄉絕。而臣下之受道者。往往竊至焉。阮嗣宗陶淵明等十數人。並遊于醉鄉。沒身不返。死葬其壤。中國以爲酒仙云。嗟乎醉鄉氏之俗。豈古華胥氏之國乎。何其淳寂也。如是我子得遊焉。故爲之記。

答馮子華處士書

王勣

乖別市爾已十餘年。誦采葛之詩。增其慨詠。夫人生一世。忽同過隙。合散消息。周流不居。偶逢其適。便可卒歲。陶生云富貴非吾願。帝鄉不可期。又云盛夏五月。跣脚北牕下。有涼風暫至。自謂是羲皇上人。嗟乎適意爲樂。雅會吾意。吾河渚間有先人故田十五六頃。河水四邊。東西趨岸。各數百步。古人云河濟之濱宜黍。况中州之腹乎。家兄鑒裁。通照。知吾縱恣散誕。不閑拜揖。糠粃禮義。錙銖功名。亦以俗外相待。不拘以家務。至於鄉族慶弔。閨門婚冠。寂然不與者。

已五六歲矣。親黨之際。皆以山麋野鹿相畜。性嗜琴酒。得盡所懷。幸甚幸甚。近復都廬棄家。獨坐河渚。結構茅屋。并廚廩總十餘間。奴婢數人。足以應役。用天之道。分地之利。薨耘蔬蓀。黍稷而已。春秋歲時。以酒相續。兼多養鳧鴈。廣牧雞豚。黃精白朮。枸杞薯蓣。朝夕採掇。以供服餌。牀頭素書數帙。莊老及易而已。過此已往。罕嘗或披。忽憶弟兄。則渡河歸家。維舟岸側。興盡便返。每遇天地晴朗。則於舟中詠大謝亂流趨孤嶼之詩。眇然盡陂澤山林之思。覺瀛洲方丈。森然在目。前或時與舟人漁子。方潭並釣。俛仰極樂。戴星而歸。歌詠以會。意爲巧。不必與夫悠悠閒人相唱和也。孤住河渚。傍無四隣。聞犬聲望煙火。便知息身之有地矣。近復有人見贈五品地黃酒方。及種薯蓣枸杞等法。用之有妙。力省功倍。不能暇脩混沌。並常行之。裴孔明雖是異名教物。然風月之際。往往有高人體氣。兼特受巧性。思若有神。自作素琴一張。云其材是嶧陽孤桐也。近攜以相過。安軫立柱。龍唇鳳翽。實與常琴不同。發音吐韻。非常和朗。吾家三兄生於隋末。傷世擾亂。有道無位。作汾亭操。蓋孔子龜山之流也。吾嘗親受其調。頗爲曲盡。近得裴生琴。更習其操。洋洋乎覺聲器相得。今便留之。恨不得使足下爲鍾期。良用耿耿。吾所居南渚。有仲長先生。結菴獨處三十載。非其力不食。傍無侍者。雖患瘡疾。不得交語。風神肅肅。可無俗氣。攜酒對飲。尙有典刑。先生又作處獨游頌。及河渚先生傳。開物寄道。懸解之作也。時取翫讀。便復

江湖相忘。吾往見薛收白牛溪賦。韻趣高奇。嗣義晦遠。嵯峨蕭瑟。真不可言。壯哉邈乎楊班之儔也。高人姚義常語吾曰。薛生此文不可多得。登太行。俯滄海。高深極矣。吾近作河渚獨居賦。爲仲長先生所見。以爲可與白牛連類。今亦爲一本以相示。可與清溪諸賢共詳之也。亂極則治。王途漸亨。天災不行。年穀豐熟。賢人充其朝。農夫滿於野。吾徒江海之士。擊壤鼓腹。輸太平之稅耳。帝何力於我哉。又知房李諸賢。肆力廊廟。吾家魏學士。亦申其才。公卿勤勤。有志於禮樂。元首明哲。股肱爲良。何慶如之也。夫思能獨放。湖海之士。才堪濟世。王者所須。所恨姚義不存。薛生已歿。使雲羅天網者。有所不該。以爲歎恨耳。吾北風痺發動。常劣劣不能佳。然烟霞山水。性之所適。琴瑟酒賦。不絕於時。時遊人間。出入郊郭。暮春三月。登於北山。松柏羣吟。藤蘿翳景。意甚樂之。箕踞散髮。與鳥獸同羣。醒不亂行。醉不干物。賞治與窮。還歸河渚。蓬室甕牖。彈琴誦書。優哉游哉。聊以卒歲。首夏漸熱。足下何如也。願動息多宜。黃頰之聚。何時暫忘。偶因南風。略示所懷。敬願珍厚。不一。王君白。

祭杜康文

王勣

兩儀判闢。萬象森羅。郛邑未建。鳥獸獨多。茹毛飲血。巢居穴窠。天地不交。人靈未和。智哉先生。爰作甘醴。上配百牢。下主五齊。以宴以禱。爲樽爲洗。萬神以降。三獻成禮。法成必弊。文盛

則華奚仲斷輪焉。知覆車。桀紂亡國。義和喪家。周公作誥。適防厥邪。我聞古時。王道正直。賢人君子。澡身浴德。降及中世。昏主作式。刑罰不中。譏淫罔極。吁嗟世道。一至於此。達人大觀。貴和其禮。與制於物。寧在於已。乘流則逝。遇坎則止。眷茲酒德。可以全身。杜明塞智。蒙垢受塵。阮籍遂性。劉伶保真。此避其世。于今幾人。我瞻前說。功高受賞。嗟嗟先生。其義可想。肇基麴蘖。光開祀饗。大禮斯備。羣賢就養。敢依河曲。建爾靈祀。前臨極岸。卻就長磯。茅茨不剪。采椽不治。掃地而祭。神其享之。

祭處士仲長子光文

王勣

歲月日隣。人王勣。謹以魚醴之奠。敬祭仲長先生之靈。曰。明道若昧。進道若退。鳥飛知還。龍亢必悔。嗟嗟夫子。理融其內。不恃不求。無憎無愛。古人有言。微妙玄通。藏用以密。養正以蒙。嗟嗟夫子。允執其中。不見其始。孰知其終。蕩蕩心跡。悠悠默語。周覽人事。退居河渚。何去何從。誰棄誰與。聊同聚散。亦均寒暑。大矣夫子。其生若浮。至矣夫子。其死若休。鄉黨不懼。朋友不憂。素琴猶在。黃經尙留。老萊不婚。梁鴻難偶。筵無饋奠。室無箕帚。嗟嗟夫子。豈圖其後。金玉滿堂。莫爲之守。凡我故人。素服臨旛。葛巾徐窆。桐棺以遷。墳不易壠。坎不及泉。苟無怙化。於我問天。道性既喪。仁義鋒起。祭非古也。禮之爲始。吾從其俗。敢告夫子。清樽薄奠。神其歆止。

東臯子集序

呂才

君姓王氏諱勣字無功太原祁人也高祖晉穆公自南歸北始家河汾焉歷宋魏迄於周隋六世冠冕國史家牒詳焉君性好學博聞強記與李播陳永呂才爲莫逆之交陰陽曆數無不洞曉大業末應孝悌廉潔舉射高第除祕書正字君性簡放飲酒至數斗不醉常獨恨不逢劉伶與閉戶轟飲因著醉鄉記及五斗先生傳以類酒德頌云雅善鼓琴加減舊弄作山木操爲知音者所賞高情勝氣獨步當時及爲正字端簪理笏非其好也以疾罷乞署外職除楊州六合縣丞君篤於酒德頗妨職務時天下亂藩部法嚴屢被勘劾君歎曰羅網高懸去將安所遂出所受俸錢積於縣城門前託以風疾輕舟夜遁隋季版蕩客遊河北去還龍門武德中昭徵以前揚州六合縣丞待詔門下省時省官例日給良醢三升君第七弟靜爲武皇千牛謂曰待詔可樂否君曰吾待詔祿俸殊爲蕭瑟但良醢三升差可戀爾待詔江國公君之故人也聞之曰三升良醢未足以絆王先生判日給王待詔一斗時人號爲斗酒學士貞觀初以足疾罷歸欲定長往之計而困於貧貞觀中以家貧赴選時太樂有府史焦革家善醢酒冠絕當時君苦求爲太樂丞選司以非士職不授君再三請曰此中有深意且士庶清濁天下所安不聞莊周避漆園老聃恥柱下卒授焉數月而焦革死妻袁氏時送美酒歲餘袁又死君嘆曰天迺不

令程吾飽美酒。遂挂冠歸田。自是太樂丞爲清流君後追述。焦革酒經一卷。其術精悉。兼採杜康儀狄已來善爲酒人爲酒譜一卷。太史令李淳風見而悅之曰。王君可謂酒家之南董。君歷職皆以好酒。鄉里或哈之。因著無心子以喻志。河汾中先有渚田十數頃。稱良沃。鄰渚又有隱士仲長子光。服食養性。君重其貞素。願與相近。遂結廬河渚。縱意琴酒。慶弔禮絕。十有餘年。河渚東南隅。有連沙磬石。地頗顯敞。君於其側遂爲杜康立廟。歲時致祭。以焦革配焉。貞觀中京兆杜松之清河崔公善繼爲本州刺史。皆請與君相見。君曰。奈何。悉欲坐召嚴君。平竟不見。崔杜高君調趣。卒不敢屈。但歲時贈以美酒鹿脯。詩書往來不絕。君又葛巾聯牛。躬耕東臯。每著書自稱東臯子。晚歲醉飲無節。鄉人或諫止之。則笑曰。汝輩不解理正當然。或乘牛駕驢。出入郊郭。止宿酒店。動經歲月。往往題詠作詩。好事者錄之。諷詠並傳於後。貞觀十八年終於家。時年若干。臨終自剋死。日遺命薄塋。兼預自爲墓誌。所著詩賦並多散逸。鳩訪未畢。且緝成五卷。又著會心高士傳五卷。酒譜二卷。及注老子並別成一家。不列於集云。

進關羊表

張說

臣某言。臣聞勇士冠鷄。宗夫戴纁。推情舉類。獲此鬥羊。遠生越雋。蓄情剛決。敵不避疆。戰不顧死。雖爲微物。志不可挫。伏惟陛下。選良家於六郡。求猛士於四成。鳥無遁材。獸不藏伎。如

蒙效奇靈囿。角力天塲。却鼓怒以作氣。前躅躑以奮擊。跌若奔雲之交觸。碎如轉石之相叩。裂骨賭勝。濺血爭雄。敢毅見而衝冠。驚狼聞而擊節。冀將少助明主市駿骨。揖怒蛙之意也。若使羊能言。必將曰。苦鬥不解。立有死者。所賴至仁無殘。量力取勸焉。臣緣損足。未堪履地。謹遣男駙馬都尉埒謹詣金闕門陳進。輕冒宸嚴。伏深戰越。

東山記

張說

兵部尚書同中書門下三品修文館大學士韋公體含真靜。思叶幽曠。雖翊亮廊廟而緬懷林藪。東山之曲有別業焉。嵐氣入野。榛烟出谷。石潭竹岸。松齋藥碗。虹泉電射。雲木虛吟。惚恍疑夢。間關忘術。茲所謂丘壑夔龍。衣冠巢許。幸溫泉之歲也。皇上聞而賞之。迺命掌舍設帟。金吾劃次。太官載酒。奉帝抱樂。停輿輦于青籬。佇翬輦于紫氛。百神朝于谷口。千官飲乎池上。緹騎環山。朱旆焰野。縱觀空巷。途歌傳壑。是日卽席拜公逍遙公。名其居曰清虛原。幽棲谷。景移樂極。天子賦詩。王后帝女宮嬪。邦媛歌和焉。以寵德也。加以中宮敦序。謂我諸兄。引內子于重幄。見兒童于行殿。家人之禮優。棠棣之詩作。于是實其筐筥。下以昭忠信之獻。貢其束帛。上以示慈惠之恩。朝野歡并。君臣義洽。夫飛翠華。歷茨嶺。至道之主也。紆紫綬。期赤松。素履之輔也。千載一時。難乎此遇。故兩曜台舍。衆星聚德。雅道光華。高風允塞。寒谷煦景。窮崖潤色。猗歟。